

四庫全書

集部

欽定四庫全書

集部  
縉雲文集卷一

詳校官起居注主事臣顧宗恭

主事臣呂雲棟覆勘

總校官編修臣王燕緒

校對官中書臣李 綬

繕錄監生臣官懋淵

欽定四庫全書

集部四

縉雲文集

別集類三  
宋

提要

臣等謹案縉雲文集四卷宋馮時行撰時行字當可壁山人紹興乙卯丙辰間為丹稜令罷歸後出守蓬黎州終於提點成都刑獄公事嘗居縣北縉雲山授徒因以為號宋志載其文集四十三卷歲久散佚明嘉靖中重慶

推官李璽始訪得舊抄殘本編為四卷授梓  
此本即從璽刻傳寫者也時行宋史無傳四  
川通志稱其與曾開朱松等共斥和議忤秦  
檜坐貶今讀其詩文忠義之氣隱然可見志  
所載當不誣惟志以為嘉熙間狀元及第考  
集中明云宣和初應進士舉又有建炎庚戌  
中秋與同官相期月下詩及紹興六年十月  
六日詩斷不得為嘉熙間人宋狀元錄亦無

其名志殆流傳之誤也乾隆四十六年十月  
恭校上

總纂官

臣紀昀

臣陸錫熊

臣孫士毅

校

總校官

臣陸

費

墀

墀

欽定四庫全書

卷

提要

欽定四庫全書

縉雲文集卷一

宋 馮時行 撰

五言古詩

遊石龍偶成寺僧通首坐飽歷叢林歸老此山  
故詩多及之

飛泉撼琳球羣山高崔嵬中有古道場紫煙籠觀臺石  
門不施關榮辱自不來霜鐘鳴萬壑日出山霧開老僧

挈筠籃上山拾羹材歸煮南澗水至味謝鹽梅食飽不  
下牀法身充九垓破衲一甲子雲間與徘徊我欲吐情  
語銘之古巖隈雲切戒多事勿聽龍作媒為雨非不佳  
世間多塵埃預恐為雨罷歸來污蒼苔

友人惠酒殊佳用清光滑辣四字為韻以謝

六府萃百感攻愁須酒兵故人如我知侵月走雙甕手  
裂絳泥封瓦盆貯瑤瓊我生百世後見此聖之清一飲  
肺腸潤再飲毛骨輕何必跨茅龍超然欲遐征



先生飲至和尺宅如鑑光餘力暨酒醴百甕春朝陽洗  
我朱墨塵凌風龜鶴腸醉鄉更飽歷岐路久已荒休吏  
閉齋閣三盞通真梁到處百慮息其俗如陶唐

苦懷茅屋底夜歸船軋酒榼對魚籃照路燃藜結及  
門呼弟昆長少常七八酣腸如有神造化不管轄搗米  
久欠此君乃餉甘滑大醉今復狂醒來恐愁殺

冠豸取能觸佩劍取能割飲酒移氣體我亦嗜清辣舉  
白飲下咽丹腑已通達温温坎離間正氣自旋斡於焉

養真勇險語犯天闈千鍾建太平豈徒為消渴

舍弟子

多女信無助多男復何虞我固喜二仲輩出三丈夫圓  
郎未解語手欲學抹朱閨郎好神氣兩眼澄秋湖復有  
新生兒初探玄海珠一一閱清俊並是千里駒胡為集  
我家足視種德符昆弟若一體在爾猶在吾堂前有雙  
親各已皓鬢鬚抱弄想慰意顏色朝愉愉未問壯門戶  
悅親良所須況我藜藿腸要當飽典謨足以立家學燦

燦遺羣維爾後更五稔汝等行不扶我欲為道肥汝當  
為書權富貴何足道陸賈真洪儒

龍鶴禱雨

地靈丘壑邃危路入紫煙藤蘿閔尺水中有龍潛淵青  
曦弄驕暉紹興丙辰年噉噉周餘民生理諒難全令尹  
謝不敏來上天公牋一念如絲芒已幹造化權夜半雷  
遶山雨出山之巔凌晨眺四郊草木亦欣然民戴神之  
休次謂令尹賢賢則吾豈敢庶違失職愆甲兵久不洗

金定四庫全書  
卷一  
風靈漲塵寰茲事非神助若為快濯滄物極理必反否  
泰如循環神龍儻有意速起飛九天

斬鷄栖木

舍南開小圃土平如沃肥去年種桃李今年花離離畦  
丁不解事其傍樹鷄栖雨潤枝柯繁風吹花葉披頗乘  
風雨力似欲桃李欺桃李不自持向人顏色低客從何  
方來指呼厲色辭謂我同薰猶蒙昏其在茲草木區以  
別其猶異妍媸再拜謝客意黽勉事剪夷桃李佳氣浮

欣欣如有知老夫意猶惡有悔不可追大哉天地寬含  
覆萬彙滋美惡詎可齊俱受一元施援毫書其事用貶  
小已私

偶成

越羅與蜀錦被體何其華豹胎與猩脣適口良自佳佳  
美未必得飽暖不可賒明通紙勝雪樂昌墨如鴉更招  
南浦石四友相寵加謾薰新寧香時烹固陵茶蕭然文  
字間亦足為生涯

憶淵明二首

晨策東籬路煌煌寒菊英我豈無他人底事憶淵明忘  
言會諸理掃盡世俗情悠然見南山此意誰與評

五音不害道其如哇淫何聊以寫我心素琴時按摩澹  
泊有妙意豈憂焚天和賢哉等冥鴻竟免嬰禍羅

題涪陵楊彥廣薰風亭

身世如浮雲百年一飄忽古人事業在己腐蒿里骨惜  
哉薰風亭勁翰儼突兀想當揮灑際浩氣漲溟渤迄茲

變故後同好亦泯沒散帙落危睇作亭煥新揭起然盛  
德後清芬念貽厥亦聞爽塏地山水皆秀發曠蕩敞遐  
眺葱蒨羅翠樾勝遊集簪履有酒備百罰異時太真園  
絳樹山砒礪吾其解煩鞅長風卧煙筏問津鷗鳥外亭  
上散白髮飄飄揖薰風解帶脚不韞咀嚼清冰圓內洗  
肝肺渴嗚呼蒼梧遠瑤琴久衰歇於焉慰永懷森森來  
披拂耿耿入踈襟更欲遲華月

登洪雅明月樓與陳舜弼楊養源任道夫孫彥

和探山水有清音韻賦詩得有字

秋風吹征衣我來亦何有長笑泉石間邂逅得良友飛  
凌長煙相與濯世垢淨宇閱寒藤傑閣架層阜登臨  
意象寬軒豁擬高厚江山來拱揖似欲問安否岌岌環  
翠屏蜿蜒拖綠綬欣然為酬對舉此一杯酒憩心自瑩  
瑩領要語不秀浩歌激巖谷朗暢孤月口峭窻鏡萬類  
憂樂隨所偶向來事朱墨伏案蠶生肘鬱鬱成底事一  
腹負百醜及茲謝塵紱未及休五柳暫與真賞愜榮辱



已芻狗況復老煙霞循寄日云久頗聞葛稚川芝朮幻  
衰朽至今杖屨地歷歷傳白叟欲往從之遊靜守一氣  
母丹成跨明月咫尺上南斗頓首排天關丐天解禍紐  
日落寒雁哀雲歸暮山黝此意竟何如乾坤一搔首

以葛稚川得名今洞  
後乃其棲隱之地

隱甫聖可子儀同遊寶蓮分韻得郭字

海縣一塵市天地一郭郭踳躄高厚而況自羈絡末  
俗競芒忽訟紙霜葉落平心作巨帚一掃付清廓無事

我所得超然解塵縛天淨鏡磨垢日炫眼刮膜野水照  
曳杖山煙薦飛屨清朋瑤璵姿興寄相領畧世間出世  
間秋風古蘭若翠嶽拂觚稜紫濫關鑰晨鐘隱町疃  
香霧散林薄竹密萬夫靜樹迸蒼蚪躍黏壁篆乾蝸簷  
絲下晴蠖蒲團便熟倚茗盃快自淪性與香火冷身脫  
簿領虐理窟深探討迷津銳疏鑿心期跨汗漫知音付  
丘壑俯仰三十秋痛被造化詭貧窮道味勝老大世故  
約妄念春朝冰不作間市瘡出據廊廟地入分禽鳥樂

時來屈伸指胸次何綽綽一官弛負擔五斗代菑穫看  
山未害廉塵迹詎可削倦鳥爭暝樹短景轉修閣一來  
固未厭再至良不惡明日復命駕便道過龍鶴

紙帳

野人抄谿苔十幅圍秋風缺月窺我床皎皎一室空錦  
繡開華堂坐挾不賞功戮辱在其後居然是樊籠先生  
於此間微吟和寒蛩須臾寢不寧覺來日升東

布被

天地一指耳笑付盃中春蒙頭布衾在得失更勿論前  
時曳竹杖步過桑麻村買費一千錢十年度寒溫恭儉  
德之基福謙有鬼神未能行於人敢不施諸身

蒲團

瘦骨何支離老鶴驚晴霜軟苧聯溪蒲一榻風月堂四  
序自鱗次跣趺貫炎涼達官重錦茵妙姬羅衣裳寒士  
倚清秋憂居涕浪浪此君勿相留我欲坐相忘

瓦爐

六籍聖賢心歸來還下帷老瓦燒栢子冉冉度遊絲侏  
儒飽欲死靈均自長飢塵言汚人耳夜來洗漣漪更欲  
清鼻觀引手時一披知我其惟天不須對愚溪

竹枕

無節青琅玕葛陂化龍餘可以奉君子不憚捐其軀幽  
人飽藜苳總以飫膏腴食罷掩關卧鼻息谿雲敷斗升  
乞西江碌碌愧非夫五友平生歡相從歸故廬

見雪

前日揮輕扇今日御重衣重衣御則已仍驚朝雪飛數  
峯起天末練練生光輝有如老大臣正色立玉墀風自  
山椒來凜凜折我髭馬上久駐目感此良慘悽一昏復  
一曉冉冉歲月移憶昨大觀初我始垂髫兒倏忽一彈  
指面目生權竒今朝天上雪宛作山中姿豈免三十年  
侵我兩鬢垂況此甲馬動憂端宿肝脾何當撥百憂采  
采山中芝一洗稻粱氣攝身凌霏微春花與冬雪俯視  
造化為去去宜努力所幸今未衰

張明遠自持其所居萃勝亭記來求詩為賦三

篇

其一

靜躁固異秉出處良一途巖前東來人鬪然應時須赫  
赫帝者師去與赤松俱鐘鼎與林泉天以私吾儒窮達  
俛仰間取捨亦須臾曲士胃臆窘屈伸自囚拘長往信  
已隘不休諒其愚倚天霜崖姿岱表張延符桂棟辛蕘  
楣超然結雲廬花草粲綺羅清飈發笙竽岡巒為肺腑

金之山人卷一  
煙霞相友于逍遙以徜徉聊可與為娛伏櫪萬里心勿  
作山澤癯

其二

百城何岌羗儲清自太初靜境超人寰羣仙之所居清  
都閔寶籙宮闕函丹書真人拜玉庭天帝手自除寶蓋  
相參差縹緲來空虛我欲從之遊茲山遂慵踈朝霞以  
為食浮雲以為車此意靡堅決西望空歛噓君今定不  
凡買山自蓄畬上方切層霄伊蹊百步餘瑤草破霧收



青精凌雨鋤往往逢迎間松喬曳雲裾為我語羨門問  
訊今何如

其三

文章蓋代手千載柳柳州落筆記山水竒香撼琳球開  
卷一再讀宛若從之遊歷歷爽心目毛髮為颼颼若人  
嗜清曠步履素得幽攬勝得樞要天地不可搜巉巉華  
山孫藤蘿護維陬絕頂葺荷蓋風月共夷猶物色自飛  
動與我相答酬千里入睥睨遠眼縱莫收憑軒寫清絕

金史卷之三十一  
卷一  
文與境趣侔柳魂不可招君幾紹前修何當棄圭組從  
君送清愁

重陽登翠園亭亭廢十年竹栢翳然殊蔽遠眼  
命寺僧芟除剪伐屏翳豁開林巒杳靄殆丹  
山之絕勝處也與同遊分韻賦詩以老杜開  
林出遠山為韻得遠字

林樾失洗沐叢灌老偃蹇坐令軒豁地雍穆成與閭千  
年李峨眉孤調絕攀挽徑欲剗君山笑看湘水遠我來

此亭上造化閱舒卷何堪浩蕩意鬱鬱仰若俛蘭蕙生  
當門尚爾付鍾畚大材廊廟具顧此何袞袞石角礪霜  
斧一斬三百本圖事欲大快不復計小損天地英氣歸  
川原勝魂返鏡開水灑灑龍轉山蜿蜿卧虹踏歸市融  
雲護春墜晴光蕩芳酌中筵舞躑躑黃花壓客帽胡床  
秋風穩萬象競參揖相見一何晚通塞有時運明晦理  
相反干戈天地閉撫事切深悃痛澆醜磊骨不復效老

阮

和鮮于晉伯游卧龍

四十髮已白百謀無一成  
林泉有夙志芝朮寄晚程  
人間好山水往往盡經行  
輒忘墮圭組所至欲有營  
卧龍勝蘭若曩游愜平生  
蒼茫紫翠間藤蘿路回縈  
上方攀躋迴遐矚襟宇宏  
風飈秋嶺瘦雲護曉泉明  
汲甘漱芳潤擷香佩華英  
境迷煙霞瘖道豁人鬼盲  
是時駕言旋濡毫記前楹  
于今已八稔愧負猿鶴盟  
君今倚巖桂冷然賦晨征  
仙人餌白石幽士飯青精  
興託風塵表咏味

見高情欲往從之遊秋夢一羽輕靜躁本異趣出處諒  
欲誠胸中一丘壑敢以易功名杖藜如可再君為寄先  
聲南嶽寬嘲笑北山緩譏評行亦老菟裘今姑隱市城  
此心隨雲歸與山日逢迎

送開守解印

窮冬自蕭疎小壘玄雲開使君擲虎符行矣何遽哉父  
老相與言未言心已哀自云好使君撫我如嬰孩天不  
為我早人不為我災使君今已行力挽不可回舉手向

父老聽我勿我猜赤驥萬里足瑤池倏往來伏櫪方丈  
間何其等鴛駘丹鳳隘寥廓五湖看如盃修羽落樊籠  
安得一毡毳驥非伏櫪姿鳳當翔九垓使君稟天秀磊  
磊真長才峽裏三家村胡為久徘徊況與艱運偶中州  
漲烟埃天子急親賢搜訪盡草萊一麾諒其微千里良  
需材棄去自騰踏為國除禍胎父老休嗟惜功勲在雲  
臺

寄魏相之

烟塵漲中州大雅欲陵替遮眼惟甲兵開口無丁字君  
從何方來落落清廟器豈覓佳吏部忠然枉輪駟快語  
真起人坐久益宏肆復歸磨破瓦自寫錦囊秘敲門遣  
長鬚恍若明星墜意遠出寥廓沈謝堪叔季音人重勳  
業文章乃餘事當其困湮淪慷慨動幽思舊管僮好在  
萬代作清吹聽君發餘論堂堂蘊經濟賈生求屬國居  
然不自試飄飄雲雨峽風沙正顛顛老聃柱下史莊周  
漆園史鴻鵠千里心蹭蹬戢遠翅平生有筆硯艱難不

相棄得失與憂樂付此一遊戲舉手忽盈紙不知老將  
至達士要如此何必苦酸鼻凌江我二友大非俗士比  
與君共朝夕可以忘世味嗟我謀生拙汨汨耗元氣相  
逢思共載羈紲但長喟別後有新詩莫忘情所寄一瓢  
落清江頃刻荷清賜一飲一再讀一篇為一醉

和何子應夜讀書

軒頊握元氣堯舜法令疎三王備文物古意漸欲無周  
平一東轍列國異車書祖龍失雲雨大漢天為謨後更



十數姓年歷幾千餘滄海屢清淺興亡如合符生平笑  
書簾遠覽資良圖滑淨一斐几萬代忽森如佳處仍三  
復此意良不虛豈無太乙來青藜夜相呼挈我遊太初  
天地如蝸廬以思不如學聖言宜欺予

江行書事

扁舟如竹葉塊坐筋脉緩起尋筇竹杖散步午沙暖石  
淨困還坐江綠污仍盥山轉孤渚沒岸落細路斷草色  
暝煙霧花樹見村畔物象總相愜欲遣詩句管詩成自

吟哦兩袖春風滿晶晶日欲暮我行亦已懶聊復喚踈蓬疊骨作小款范蠡定何人得遂老蕭散我待功成後此語正恐誕徑欲具蓑笠煙雨隨蠻蠻

建炎庚戌中秋夜與同官相期於月下既為具  
頑雲障空不可人意作詩以紀之得賞見二

字

散懷誰與儔風月茲吾賞好景會人心宿約每不爽  
樽收濺明河玉露洗穹壤肅肅夜氣寂皎皎素沆漭飛出

未半弓已照天地廣茲夕豈易得久矣俟清賞雲師誰  
爾忤屏翳蔽虛敞萬事不可必變化如反掌太清一滓  
穢幽娥動懸想誰為披層霄快哉心枝養聞君洗瓦盞  
倒榼有餘盞何當數列炬酣歌散清響有月固來游無  
月須一往

玉皇勅諸天茲夕盡羣見驅雲收月光反照玉京宴老  
龍翻海窟杳靄鬱萬變天公有嚴令遺隙無一線蕭蕭  
寒桂影可想不可見生平謝惠連與月有深眷對影無

清暉把盞不下爍亦聞顧免藥天成非九轉可使騎清  
風飛入廣寒殿安得一刀圭扶我起宇縣稽首分帝觴  
飽以瓊糜薦回首鄰清娥相將以遊衍人間滴與瀝役  
役自卑賤

贈故人二首

一日如三秋屬君情所專晨風吹初春繞屋鵲聲乾得  
非造物意憐我徒侶單放晴速君歸一笑不作難起攜  
化龍竹消散枯體酸矯首東山雲行人為我言言君騎

紫馬近在十里間溪邊古松隄柳波梅飛殘疾走落巾  
履歡迎許平安津眉間黃顧我一粲然頗云萬貔虎  
枕戈卧西關元戎坐惟喔花幕清晝閑井絡天一涯可  
以加飯餐復出羣公詩字字冰雪寒窮探到冥窈老語  
角險難一讀重驚嘆再讀醒昏頑嗟我平生心文陣亡  
左旃遽拭涓滴眼窺此瀛海窳並驅吾豈敢愧負百且  
千尚能督租賦用博酤酒錢日日與君醉高歌易長嘆

再和

煌煌六藝學兀兀門亦專耕道宜有秋而我適旱乾疎  
鬢日月邁破衣霜雪單誰謂四海寬已覺一飽難失計  
墮薄領署判手為酸皇家挈天網昨下如綸言冷眼看  
匠手雌黃英俊間華堂玉塵動繡簾香鴨殘為國得一  
人可使天下安當時呼畫師我愧寧不然策勲徑投筆  
守志甘抱關渥洼萬里心束芻老廡閑豈無首肯盤可  
以羞晨餐宜無艾荷衣可以備祁寒天地日莽蒼逢辰  
諒多艱世既不吾與不去良亦頑搖搖故山心長風動

旌旃君今門下士良莊滿人寰與我各相去何啻一小  
千異時白雲邸仰君分酒錢富貴無相忘勿徒況永嘆

西北有高樓

西北有高樓氛氳臨大路飛簷轉春風綺窓瑣雲霧姣  
服者誰子傾城此容與娟娟長眉青不受脂澤汚娉婷  
惜不嫁恐為蕩子悞寫心沉清瑟獨不怨遲暮

東方有一士

東方有一士不見心中忡忡尺璧未足多夙好良所同永

懷不能寐攬衣出房櫳  
遙夜未渠央取琴和秋蟲  
豈無時世交掣肘不相容

題報恩方丈宋子展所作墨竹

叢筠抱清節茂若含幽翠  
孤樹老風霜空枝少春意  
其中有磐石人莫知其器  
堅頑如我心脫盡榮枯累  
畫不與詩謀詩輒窮微理  
何時逢畫郎忘言笑相視

和楊拱辰見惠

所操或異趣竝席寧相親  
臭味儻不殊千里情猶伸  
古



今邪正間何啻萬微塵平生閱世眼服膺無幾人濟濟  
數君子龐然氣深淳南郭服仁義轍跡世所循楊侯墨  
池孫清厲凌蒼旻公幹抱竒蘊聲咳皆瑰珍造物豈私  
我惠我為德鄰賤子嬰禍羅躑躅巴江垠棄逐類秦客  
顛顛如楚臣九死不能悔百煉未失真敢希鳴玉侶庶  
混擊壤民飲水蠲煩燥薰香懺貪嗔竭來古安漢息黥  
幸依仁至道迷所適避風時問津昨者枉車蓋正值霜  
雪辰厨空無盛煙坐冷乏軟茵牆頭丐鄰翁殺核粗且

陳公言我未暇語竟即踐踐挽袂不可止滿坐顏色顛  
公方遲騰踏我已甘隱淪我歸楚之夔公家蜀之岷感  
此會合難時來笑脫巾酒戶較深闊句法窺清新縱遊  
當秉燭正恐別鼻辛公能勉此樂我及畱中春

再和

人言不飲酒神形不相親我云不遊山足孿不可伸徑  
須向泉石抖擻人我塵況復山林姿豈類軒冕人出門  
見四野便有羲皇淳昔遊頗有得已事猶可循異時春

開陰晴霽如秋旻殺軟粗提攜不必皆竒珍客居我貧  
者尚能乞諸鄰相與臨小軒眼界浩無垠水遶拖長帶  
山來趨小臣軒前聳朱鳳曾是棲羣真飄遊邈何許蹟  
可訪遺民吾徒況健步人扶必怒嗔頻行當導引能除  
體不仁想當聞此約喜見顏津津必不類世俗咫尺小  
參辰鳥語聽妙轉草軟藉芳茵信宿得蘇李良會如荀  
陳翻思塵土中旦暮走踈踈有如對酸醯未啜已深顰  
放意寬衰颯收機入混淪尚欲挈妻子終焉老西岷或

金  
卷一  
一  
欲東入海披髮謝冠巾  
況茲一日遊暫令耳目新於事  
竟何補在已徒自辛  
騎馬事干謁汨汨窮昏晨不如且  
行樂一笑酬中春

和嘉州通判賈元升見贈

山城鳥鵲喜佳句  
來春風浣手三過讀  
散我磊砢曾當  
年過秦論千載猶為雄  
今觀妙好辭蹠躩  
追前蹤文章  
信有種字字含徵  
宮少城初識面軟語  
開沖融秋月耿  
高懷春水瑩清衷  
俱墮人事海煩促  
難春容況乃燕雀

卑未易參鸞鴻別來印笮外一笑誰與同羨君對賢收  
快飲如渴虹何當款齋閣餘瀝借衰紅所幸九河潤密  
邇千乘封臭味譬草木我輩情所鍾夢隨沫若水下與  
九頂通更願洗老眼見君攀翔龍

題蘇慶嗣睡樂軒

六鑿森劍戟一枕寄華胥睡覺既殊轍睡兮真樂歟達  
人蘊大觀方寸包太虛憂樂兩不知寤寐常如如昔也  
蝶栩栩今焉周遽遽而今我法中無欠亦無餘以睡為

樂邪不睡寧非渠然則此軒名無乃滯一隅蘇子笑  
而應斯豈真吾居飄流閱世故早覺心地初今古一偃  
仰天地一蘧廬揭名聊爾爾至言恐驚愚

出郊以江路野梅香為韻得路字

居然麋鹿性疎散疾已痼杖策城東門曠景引閒步日  
正搖江影春已暖沙路疎梅忽相值與我如有素清芬  
煦嚴律玉骨洗寒露頗復動詩興況乃有酒戶與君喫  
花飲飲罷為花賦攬此冰雪姿裁作山間句更得雙南

金何遜似風度夷融興未愜短景不少駐呼僮扶步歸  
要折花無數

寄題何子應金華書院

吾聞何月卿逸氣欲傾瀉詞源浩班揚詩律薄風雅想  
初讀書眼坐閱燈檠炮士生貴適性安得計用舍青鞋  
踏九疑絲絢遠金馬飄然瀟湘遊采芷動盈把吁嗟既  
憂患猶得營萬瓦我無茅一廬劫劫思里社

送馮獻道運使得岸字

蜀江灩新肥送客上霄漢別懷老易感醉憤狂更岸春  
暄鼓氣全風軟帆力半青雲隨步復紫氣鬱几案清明  
銷積陰當陽盛熙旦羣姦付嚴科四海歸睿斷君行此  
其時國光炳大觀況乃濟時須礪砢真巨幹舉杯酌  
尾為賦鹿鳴亂雲從動巖穴起我病瘡瘡溝壑未填委  
胡為甘屏竄日邊多故人為我致此段

題郭信可琴中趣軒

泠泠接吾耳塵爾非真精大音寂無響瓦礫如雷鳴古



今滯迷妄溜溜塵所縈落葉隨水去顛風吹殘英道人  
了本源超然契無生銷鎔天所做浩蕩還空明視聽非  
耳目沉復求音聲竹木闕漁社衡茅落初營杖藜候晚  
收曳履看春耕無為萬物逝不言四時行情塵泯絕處  
大地皆醜醜淵明出醉語能與此理并見之偶一笑呼  
兒署南榮莫作如是觀吾軒本無名

題虎丘

海甸平無際突阜如踞虎杉松闕巖壑殿閣煥藻黼老

金少一人  
卷一  
眼凌雲煙吳會畧可俯昔遊恍如昨歲月不勝數老矣  
愜重來病倦喜欲愈況復偕賢彥清罇侑歌舞高談聞  
善謔錦繡落英吐籬菊粲佳節山屐霽淫雨蜀客萬里  
外艱虞棘肺腑摧頽已無氣賴此作一鼓却欲挽長江  
快意洗天宇且復置是事秋風送歸櫓

中秋飲張仁甫家探韻得玉字

數日及中秋迎月試新醪清暉困屏翳頽陰費驅逐廣  
座迷罇俎高堂費燈燭未用卹一肯何妨縱百沃見人

如見月張家呼小玉

同郭師聖司空仲容探韻得江字

孤月流高天分影遍千江  
我來無人境亦復窺幽窓  
好客如佳月開門輒撥月  
到客亦到不隔山峴磴  
把手入茅廬笑語鐘新撞  
一鳴驚人友更挾飛鳧  
雙連壁光照眼老我心  
所降呼童洗瓦盞竹葉  
傾山缸清谿漱鳴玉老  
樹森高幢更招二三子  
放懷山水邦分題得佳句  
一字鼎可扛男兒樹勲  
德出手便可樁願移詩  
句力挽

俗還純厖惟予心已灰庶幾鹿門龐

與諸友同坐梅下月霧淒清風琴冷然不類人

世各聯三二語醉歸卧南窓下明日徵所出

語皆忘失不記因追賦古詩以補遺缺

月冷逼疎影梅孤泛清光兒曹竅孤竹天風韻絲簧相  
將二三子中夜聊徜徉泠泠白雪唱灑灑碧霞觴清絕  
非人境浩蕩真醉鄉飛花炯天星墜葉鳴瓦霜歌放滿  
空闊神融接混茫三山今何許仙游諒荒唐人間有逍

遙豈阻路且長簪紱縻步武得失煎肺腸役役少至老  
過問或未嘗以愚息我機以學鋤我荒以文導我興以  
酒發我狂使與風月親寧不荷彼蒼夜久梅影偏月亦  
隣西岡嚴風吹冠巾白露霑衣裳歸歎掩關卧枕上從  
羲皇

七言古詩

遺夔門故舊

蜀江迸出岷山來翻濤鼓浪成風雷掀天幹地五千里

爭赴東海相喧唼白鹽赤甲當道路呀然拒之欲使回  
大山大水相較力宛轉稍肯開東隈山氣盛豪水氣怒  
二氣停瀆成胚胎離騷兮作文章祖始知孕秀鍾英才  
曄曄令君出此地得非千歲之根茲願祝君如此山水  
滔滔岌岌風雲起人言富貴出長年拭眼看君出奇偉  
功名落落麒麟閣公當不負山與水如我頑鈍何為者  
剝買耕牛老東里

安清洞夜坐有懷

屋角錦樹風飛揚陰岑夜色凝清霜結庵雲竇謝塵俗  
危然搔首憂偏長背燈顧影空寂閒亦復自怪何昂藏  
人生百慮已大瘦顧我耿耿無他腸年來戎馬暗河朔  
宵旰十載煩吾皇時將朝事問府主王路安得成康莊  
我亦乾坤一窮士癡心未肯老為郎浩歌慷慨擬投筆  
門外太白空煌煌願學北地傅介子一節出斬樓蘭王

責睡魔

綠陰滿門春已還黃鸝門外猶綿蠻蕭蕭冷官無一事

高齋搔首兀癡頑睡魔襲我意蕭散直來眉睫揚神姦  
須臾爽氣溷塵俗雙眸瞑眩那能覩彌明未斷口頭句  
鼻息如寄雷車間夢魂恍恍何所適飄飄寥廓辭躋攀  
松風拂足雲生腋深窮月窟超人寰更尋織女支機石  
天河西戶聲潺湲無何有客乘晚興剝剝啄啄敲柴關  
驚回清風枕簟冷赤霞夾日崆峒山一日廢書強舌本  
萌生鄙吝勞清刪謾學昌黎送窮術揮毫加點文爛斑  
睡魔憑物對我語勸我停手開憤顏自言宇宙若非我



人生俄頃無休閒

謝素師惠二石

素師為我良古僻野性乖疎無與適呼門投我清淨友  
翻是巴江兩好石一石形作巢蓮龜近人團圓生素迹  
皎如孤月流清空光逐一星斜辟易一石初似瓜色黃  
年來應被天公劈枯松說與連理心參差再合如膠漆  
兩石相逢已投分何消引我為儔敵與君傾蓋便忘年  
未害吾人縛禪寂方今宰相真儒生議割三關厭勅敵

祖宗土宇安生靈幸以艱難念開闢天畿要險壯中華  
一日捐之良足惜爭如推轂老將軍遠煽天風驅退鷄  
我雖孺子亦有知不憚下圯傳履舄嗟爾兩石如有神  
尚父兵書欣所習不應默默齋閣閑相對人間夜寥聞

和郭信可苦寒曲一首

朔風吹沙邊雲黃行人墮指鳥獸僵鵬鸞裘弊醉何有  
呼吸七氣成冰霜畫堂繡幕圍絲管馥馥麝煙紅吐煖  
貧人尺布不可縫夜長展轉牛衣短將軍領戍山上山

勁弩折角刁斗寒  
鈇衣照雪夜如水  
哀雁一聲心欲死  
年年官賜冬衣絹  
婦女從軍身不徧  
來歲愁寒須努力  
農家飢死無人織

關山月

秋笳吹斷朔風起  
霜結層冰斷遼水  
殺氣橫空月上遲  
草色蕭瑟邊風悲  
萬里征夫齊悵望  
操兵初入沙場廣  
將軍樊噲勇敢兒  
肉食萬里班超相  
天兵乘障驅貔貅  
寶劍欲斷星旄頭  
輕生百戰百勝罷  
塞原積骨誰能收

至今唯有關山月樂府聲中愁不絕

陽春曲

柳帶抽春寒氣淺風光曉引春樓怨關山行人久不歸  
鸞瘦舞腰雙綬緩錦書難寄北征鴻歸飛海燕翻晴空  
芳菲韶景伴愁老蘭苑桃花落照紅

自開江歸依山結茅以居偶成長句

酒腐於爵肉腐俎擔石之儲我何有陸居無屋江無船  
誰人乞與買山錢大梁千里森寒玉瓊茅桂棟營山麓

雲涵雨露謝天公苦為貧人養黃犢秋衣更續谿芙蓉  
蟬腹龜腸欲御風戲遣冰懷搜老語食無煙火更玲瓏  
銅臭錢鳴總無惡更換清貧終不諾濁不能堪飢可忍  
木強須撩天一晒

題楊氏清福亭

幾年瀕江種松竹鬱鬱葱蔥蔽江曲猶有楊侯舊子孫  
更結高亭貯寒綠東家殺賊印鑄金西家言事腰胯玉  
一罇徑醉我不知不待招呼風月足有客胷中抱經濟

才高正患功名促，閒為清福非吾事。乞與此亭作佳目，主人再拜不敢讓。願作閒人老林麓，江平酒熟夜收釣。鴨肥稻香朝坦腹，此時寄語惡長官。勿遣追胥駭僮僕。

紹興六年十月六日同信可舜弼進道謁隱甫值渠曬畫於中庭遂得縱觀中間不無可人意獨范寬雪山八幅超然絕羣令人意象肅如真得脫身歸巖壑間者請賦詩以知君重毫素為韻得君字

畫山畫骨更畫魂范寬此中高出羣君家八幅老筆墨  
百年古篋鋪香芸我來日出掛東壁蒼崖落雪飛紛紛  
寒鳥不動空無塵蕩蕩晴天開四垠終南太華入霄漢  
秀色千里填河汾想當盤礴未畫時天地開闢雲中君  
長鯨吸川欲酣醺疾起信手驅風雲須臾却立萬嶺下  
援筆往往齒沒齷平生愛山在夢寐行年四十老更文  
摩洋巖壑重感歎徑欲杖屨從麋麇畫龍儻有真龍至  
歸即到山非浪云列仙之儒恐邂逅煙霞芝朮應平分

策師南遊過三峽見予求施以詩會余憂悲苦  
惱無意賦詠姑借梅為喻送行則無一字不  
著題此本分事不妨大親切也策將安取紹

興十四年十二月一日

策骨寒瘦枯梅枝梅花開時徵我詩我詩悲瘁作無意  
借梅代我陳其詞梅云最先得春意桃花亂攪作佛事  
千年冷落空自知今日相看合何似迦葉眼睛誰不有  
先覺我當為上首普令世界識春光南枝待入瞿曇手



僧有悟策者見予於珞磧江上誦程子山孫李  
辰李仁甫賦成都信相寺水月亭之什僕屢  
客成都朝夕過信相鑑公求此詩至再三余  
謂詩於佛法業成綺語每笑訶之不為作今  
策誦二三公佳句起予追賦長句付策令寄  
鑑公

天行明月地行水水月相去八萬里天公大力誰能移  
月在水中天作底我心與月明作兩真月本在青天上

金方曰八卷一  
卷一  
雖云佛說我別說恐入衆生顛倒想少城城隈佛宮闕  
客哦水月僧饒舌三峽水寒梅花時起予對月賽此詩

江月亭

朱幾聖來為張氏求江月亭詩舟中載四大  
部經函有蛇出其旁幾聖以為經之異予曰  
焉知非明月沱中龍將亦求詩邪故作詩付  
幾聖而併及之

張家作亭跨江月久欲題詩詩思竭今朝龍泉寶函來

豈亦索詩光貝闕忽憶曩時醉亭上笑倚長松清興發  
波光浩渺蕩鷁俎夜色鮮明見毫髮是時披襟揖灑氣  
翻滌肺肝洗塵骨歸來至今忽想像猶覺人寰可超越  
會當月夕駕煙槳吹笛呼龍出龍窟蓬萊方丈儻可尋  
借我長風泛溟渤

題楊毅肅十馬圖

平生仰聞毅肅公南征北伐開駿功所乘十馬有圖畫  
今觀逸氣猶追風當時血戰冒飛矢一中鈎膺一貫耳

功名富貴豈偶然請看將軍出萬死紹興壬戌之仲冬  
李巖城頭霜月空夜深無寐開素軸感時撫事三嘆息

和楊偉明韻

黃花不待我西歸去載空吟九日詩今載擬招風月友  
共醉黃花香滿枝佳辰不許負佳客我友南北如分岐  
驕馬行嘶縉雲碧楚狂使我無退之把杯聲作噫吁噓  
傷予未遇空嗟咨雄文自是送窮術那憂窮鬼長相隨  
牘中燦燦藍田玉有誰懷寶遇明時慷慨男兒當自料

少把閒愁愁所思

題岳陽樓

洞庭涵浸八百里岳陽樓高跨湖尾  
天空地迴豁疎襟有客臨風來徙倚  
是時窮冬天氣昏慘淡愁殺湘君魂  
層欄半落煙氛外浩蕩猶恐旋乾坤  
異時清霄玉鑑白空明月路飛仙  
客明朝露華洗七澤萬頃寒光天一色  
眼中未見此境好他日扁舟吾未老

縉雲文集卷一

欽定四庫全書

集部  
縉雲文集卷二

詳校官起居注主事臣顧宗泰

主事臣呂雲棟覆勘

總校官編修臣王燕緒

校對官中書臣李 霖

繕錄監生臣官懋弼

欽定四庫全書

縉雲文集卷二

宋 馮時行 撰

七言古詩

遊君山值冰合不得進

東畧扶桑還掛席朔雪顛風經赤壁欲呼龍伯出珠宮  
戲上君山吹玉笛仙人未熟長生酒故遣玄冰凍湖口  
洞庭千里一鏡中煙鬟黛抹空回首丹經素書舊巖丘



長歌歸去吾不留他年酒熟當勸客鶴使相尋縉雲側  
題張粹夫萬卷樓

儒生讀書不貴書枕頭閣脚醉夢餘反不若浮屠寶貝  
為函金作字海龍扶出凌空虛君今收拾一萬卷置在  
高樓截雲漢想當日月出沒間玉軸牙籤互璀璨我欲  
牽車駕黃犢往發緜緜煥心目論孟久荒緣老病請君  
為我刪嚴令

宴林簡州桃園

樂昌溪東大江頭脫木老屋風颼颼開門滿院種桃樹  
桃花主人林簡州明年二月爛照眼簡州西川醉春晚  
憑誰管領江上花但寄玉醪三萬盞為君對花連日夜  
翻杯作雨雨花下使桃大如玉母所種高參天直使花  
氣連西川

送召客

暮春送客朝明光顛風吹花繞柵檣大江吞天日出沒  
赤心許國一葦航平生夢躡螭龍尾天門九重九萬里

一朝巨手開天闕丹極紫霄隨步履兒輩端非五湖匹  
國柄今歸謝安石遙之別墅清晝長笑拂楸枰行折屐  
共傾東海洗乾坤景仁況是名公孫四郊多壘士之耻  
富貴浮雲何足論宦海十年風退鷁我亦彈冠聽推轂  
安能鬱鬱久居此朔飢欲死心不死

和張仁甫李花韻

江頭誰家千樹李影落清江徹江尾風吹扁舟到花下  
花間啁啾亦欣喜瑤林成徑千步長花光燭天天半香

恍如坐我羣玉府飛瓊酌勸青霞觴勝事此游難具列  
照映肝腸盡明潔老懷已戒語作綺新詩向擬風回雪  
東家西鄰詩更竒一時共借花光輝更須妙索留春句  
無使花飛春告歸

李花已盡再用前韻末章專屬蒙景明資一笑  
也

向來風前見桃李今日紛紛落風尾老人於花亦何有  
不用天公事嗔喜漫天高跨風力長更飛急雨湔餘香

雪兒歌底踏舞馬燕子泥邊隨濫觴明粧皎皎爭前列  
觸手還羞疑不潔芳菲已斷陽臺夢只有消煩嚼冰雪  
明年祇應花更奇豈無方畧留春輝欲作短章憑阿素  
只待西隣之子歸

李彥澤紫雲洞

玉帝侍臣紫雲翁帝嗔謫居跨鼇峯年齡瞬息反帝所  
空有衣冠藏山中山中草木俱不同紫雲霏微氣鬱蔥  
風清月白巖穴空翁猶被髮乘虬龍來從南箕驅長風

人間奔趨爭追蹤依稀可望不可從披尋遺編三復重舜  
庭絲匏間笙鐘嗚呼翁兮終莫從姑從遺編愈盲聾

峽州楚塞樓

東南上流蜀之門領峒形勝斯樓存岷我之西江發源  
勢如建瓴注平原出門頓息波濤喧五溪七澤相吐吞  
蜿蜒紆餘帶城垣山亦却立且踞蹲排青巖翠來庭軒  
座隅髣髴聞清猿我來新律當正元天地清夷日晏溫  
主人延客開清樽酒酣疎襟忽孤騫北望兩京手可捫

金少曰凡一二  
卷二  
感時撫事銷客魂  
比聞敵幟猶續繡  
躑躅海宇脊分奔  
赤縣神州宜細論  
翠華幾時驅育賁  
歸挽天河洗乾坤  
願見從來中國尊  
老夫日拭雙瞳昏

遊我眉

向來一紀登臨意  
白髮顏齡才一至  
阮哭窮途真可笑  
孔小天下或如是  
平生歷覽廓無礙  
方稱老懷疎不綴  
安能却粧住雲霄  
更不婆娑下平地

杜如篋屢督烹茶  
仍作詩次其韻

老寄餘生山水窟，寂無朝煙屈砒砒。客從何方問棲隱，  
無人應門杖藜出。言間遺我翠玉餅，把玩芳香襲呼吸。  
便欲洗殘試水品，腸胃空枯恐稱屈。臧藏小篋掛東牖，  
惕若虬龍隨手入。雲濤雪浪有變化，扁鐺苞苴何鬱鬱。  
痛嘗七盃豈不願，待營一飽終無及。窮人談富如畫餅，  
浪說烹炮詭知識。真求大嚼薦茗飲，可笑詩人太癡絕。  
豈惟枵腹誤指染，更并麗句成乾沒。亦知且具衲子供，  
澆淋蔬筍供一吸。恐君肺腑出宮商，造物反怪太喧聒。



又恐展轉夜不寐深思危慮比孤孽何如待我食萬錢  
東閣大開玉醅潑翠娥捧香沃煩膩醉起一笑天地闊  
男兒蓋棺事始定所不踐言有如日

廣安朱義從為渝上霜臺之客母夫人年八十  
餘極其孝養一日有三白鷺翔集中庭不去

義從作翔鷺亭識其事縉雲子為賦此詩

振振鷺鷥于飛白華遺音詠潔白故此翔鷺呈鮮儀萱  
堂八十癯僂姿無心更出風絮詞夜入佛觀燈耿耿晨

翻貝葉多髮絲郎君風標晉人上芙蓉照映清漣漪晨  
昏定省履聲細鷺兮飛躍隨彩衣吾聞擊石百獸舞又  
聞上世巢可窺余生眼明見異事感今懷昔為此詩

山中宿小民家夜聞虎因有感

虎叩門山風裊裊吹黃昏編蓬為戶隣虎穴敢於虎口  
寄浮生干戈時有人相食吏猛於虎角而翼虎叩門不  
敢入使我愴惻長嘆息

正月二十日上山莊二月晦日歸不見花

山巒屹立屏幃山上無花不見春下山花落空惆悵  
媽香空後芳草萌芳草萋萋愁更生子規啼血不見花春  
又別我天之涯

和張仲山寄酒

兵厨盎盎享盈缶憐我十年青濮口投醪分惠繼以詩  
詩更分香過於酒酒瓶詩卷墮我前頭使幽棲添二友  
朝吟直到屋翻日夜醉不覺山銜斗也知庭內無留難  
掃除弊事如揮帚龜陵千里數萬家誰不高擎加額手

公餘退食多燕衎一斗百篇困何有餘波借與草木春  
況是江頭釣魚叟更煩遣騎日聯翩暖熱縉雲先馬走

變帥范太尉生日

秋空無雲倚太阿天駟不受金盤陀英姿傑氣狹宇宙  
却立引手攀明河已辦長纓三百尺縛取單于寄飛馱  
徐揮白羽掃龍庭停驂戲勒燕然石落落雄圖九萬里  
白帝屈公朝夕耳天使中興氣象自公還還當與公金  
石年

恭州楊倅生日

鳳龍虎豹無凡文墨池太玄之裔孫至寶不琢粹璞具  
猶有太古羲易淳渝州別駕未足論嘯歌已是騰清芬  
一錢不輸縣官手飽食長歌耕隴雲生朝佳氣氤氳集  
歡聲一境聽洋溢願從黃童至白首年年擊壤歌君壽

劉守生日

天清地淨行清秋帝命吉祥驅葍收九霄墜露濯仙骨  
冰壺翠鑑塵不留十年持節東西州繡衣輝煌照遐陬

山之岷峨水之涪兩川至今騰歌謳渝城突兀大江頭  
豈足滯公霄漢遊鬱葱之山海上浮上有仙人老浮丘  
玉井蓮開花作舟載公縹緲登瀛洲瓊瑤之臺白玉樓  
霞裾飄飄海上遊仙人吹簫勸黃流一觴不老仍不愁  
始知仙凡隔塵土人間袞袞真浮漚

常君挽詞

邇城之山龍蟠岷山下佳城何鬱鬱一杯黃土百年心  
數字寒旌萬里骨風愁雨悲春色死生長何方葬於此

亂離溝壑半公卿不得如君君有子我生苦晚復異縣  
平生不識先生面但聞其見元祐時傷今思古為此歎

石孝立挽詞

斯人已矣舟移壑惆悵九原誰可作靈光長與孤月孤  
幻化偶隨落葉落人間好事平生有留得芬香傳萬口  
楊侯宅畔蜀江邊霜立梅花醉衰酒伯仲如林吾所愛  
俯仰十年無一在鬢邊日月去如飛老懷不待秋風悲

五言近體

題香積寺

撥草簷風日招提重訪尋  
雪如將路斷雲實助山深  
密印傳初祖英風嗣少林  
我來聊借榻靜夜聽龍吟

天華寺亭二首

老去心如水眼明猶愛山  
偶來出已意特為破天慳  
能使渺茫處盡歸尋丈間  
公餘成踐跡心事等雲間

又

一亭開浩蕩千載納幽閒  
日色射丹巘秋姿凝翠鬋  
人



家屏上見鷺點鏡中還冷宦驚人眼無妨飽看山

遊東郊以園林無俗情為韻得情字二首

野寺日欲落晚林煙自生霞文明遠水鴉點背孤城酒  
盡無間酌茶粗得老烹歸來喜不寐濩落稱余情

又

散漫藤蘿外飄然猿鶴情雲山如有舊草木半無名隔  
竹寺幡出前村砧杵鳴乾坤清絕地猶覺是昇平

詠雪

疎木墮栖鳥寒潭悲卧蛟與松為老伴  
喚月結清交  
簷滴冰為筋  
梅添玉作梢  
豐年何以報  
作頌紀南郊

阻雪

朔風飄正急  
客況老難禁  
問路迷南北  
攜筇探淺深  
地驚盈尺許  
盃喜十分斟  
梅藥如相識  
暗香何處尋

寄張昭度

知君多暇豫  
山縣少追胥  
日晏未鳴鼓  
夜分猶誦書  
相思千里外  
一見二年餘  
錦水連三峽  
時通雙鯉魚

臘月二十八日

晷景餘三日憂愁盡一年酒侵新歲熟花待故枝妍隣  
里多遺餽庖廚有盛煙擁爐風雪順春意欲相先

除夕

峽裏江山暮愁邊日月窮酒濃新不飲春近舊多慵歲  
事橫曾憶年華入鬢蓬明朝有王會心與蜀江東

元日二首

穀旦休祥見元朝氛祲開日車扶曉出斗柄斡春回致

理歸廊廟私憂尚草萊太平豈無象天意是胚胎

又

日月新年節乾坤舊觀還鬱葱浮曉霧紫翠動晴山御  
氣籠宮闕朝班雜佩環遙知王會散喜色粲天顏

和何子應盛山一首

徑掃風雲淨爐薰山谷香葱環暗壁金碧跨崇岡小  
雨留歸旆飛霞落酒觴干戈遠如許稅鞅更何妨

和何子應記所見

公事有餘暇披衣繞風林高吟起高興聞事引開心未  
種淵明柳方鳴子賤琴幾多疎散意矯首亂山深

清明

律歷調元氣氛埃廓景風清明歸在宥顛顛得沖融日  
御元來正王春自昔同野人看氣象暫覺百憂空

寓興

乘軒知有負啜菽苦無歡萬事等一夢寸心當自安荆  
卿甘度易李愿喜歸盤默坐發深想春山猶夜寒

彭山道中

劫劫真無謂，遲遲再有行。  
斷雲峰出沒，殘照水分明。  
遠意誰能共，長亭空有情。  
從今離別夢，逐夜到江城。

旅興寄張惠之

始覺歸耕晚，從誰話此情。  
但能安食息，敢復計聲名。  
留滯煩書信，艱難愧友生。  
有懷悲不盡，歸鳥暮雲橫。

舟中見月

濮上今秋月，於人大有情。  
銀盤隨水湧，素練截江橫。

關天光近舡虛夜月明寒光迷上下萬里一心清

送友人兄弟赴省

書劍一門去由來得主盟  
戎冠雖合還再鼓已聾盲  
風急鷓原起雲高雁序橫  
天衢在咫尺去去任飛鳴

就得勝寨遣人入巫山買酒

開道巫山縣秋深好白醪  
形神須此物觴詠本吾曹  
馬杓勝鸚鵡羊羹當蟹螯  
暮寒催渴肺徑欲賣青袍

白雲安尉出戍至夔州

戍鼓黃雲外征夫白帝東  
風林行嘯虎雨夜颺哀鴻  
路入山光靜村舍晚色空  
嵐煙欺眼力不見鹿皮翁

至日三首

太史書雲日周家紀歷年  
一罇供笑裏五載客江邊  
城暗催春雨山連作雪天  
功名驚過隙節物自推遷

又

至日寒無賴今朝愁奈何  
兩宮黃屋遠二老白頭多  
聖主今嘗膽皇天忍薦瘞  
乾坤為回首慷慨一悲歌



又

令節仍長至公家放小休  
愁城開六府醉眼見千憂  
梅萼含春小雲容帶雨收  
曦娥自來往生理百年浮

遊寶蓮寺分韻得塵字

路出青山近招提更可人  
清心鐘磬響遠跡簿書塵  
晚日池邊迴秋風杖履親  
頻來一樽酒不畏老僧嗔

楚甸江頭望雪晴二首

歲暮風欺客天開日解圍  
雪消無奈白雲細不禁飛目

盡江無盡吾歸雁亦歸曉來清徹骨塵物污人衣

又

晴天開澤國江渚匝煙圍鷺靜蕭蕭立梅孤默默飛岸  
荒羣虎過村迴一人歸愁緒如相惱帆收徑典衣

遊樂磧江中石洲

石出杖藜穩沙暄牽興長半江鷗鳥地三峽水雲鄉攜  
客撐煙艇開樽俯綠塘便當從此去煙雨釣滄浪

行遇小雨

小雨暗兩岸孤舟撐一篙清同寒鷺迴愁與暝雲高已  
判亂波色時饒點鬢毛三農有重賦為汝喜如膏

夔州撫屬陳行之座上作

雲細不成雨虛從萬里還卸帆逢故舊把手話間關酒  
濁消千慮春新見一斑便須開口笑白髮不勝刪

至日讀莊子

世路頻時節山城暗夕煙酒先回暖律梅自斷殘年日  
月長江水功名小井天如何割幽抱更與問虛玄

謝景濬卿東州名士未曾傾蓋因僧悟策有詩  
寄余臭味不殊千里同契望風增感作詩寫

懷一首寄謝

客唱凌天路僧傳到野亭人間聞譽處句裏識儀形學  
道荒文律嬰愁鈍性靈只如老瞽史音節尚能聽

歲暮舟次荊州呈李堯俞

肅霜聞渡雁湖海發歸舡煙樹開吳澤風帆盡楚天經  
過成往事信宿是明年詩句隨元禮雲山共一天

舟中觀雪呈李堯俞二首

孤渚凝寒睇斜風看亂飄已狂難自定初泊不勝嬌白  
向水邊斷輕來衣上消更愁清夢覺篷底聽蕭蕭

又

密雪晚來急扁舟江上看凍雲千頃白對我一襟寒屢  
冷深猶立巾欵重更彈家山想同夢夜倚玉欄干

自行在解維宿長安開下回望天竺諸山依依  
在目微臣去國撫事感傷因成此詩

歸來豈不好去國意如何  
主聖憂思切時危習俗訛  
山高更回首天濶阻悲歌  
一寸丹誠地餘生感憤多

再登岳陽樓

樓高臨迴渚天闊上丹梯  
雲盡樹不去水平天更低  
江湖分去住吳楚亘東西  
遐矚寬幽抱愁多望轉迷

和楊園練元韻

此生渾襍穢秋鬢漸鬅髻  
躋德山徒仰雄談壘更增奇  
謀閒袖手佳句老傳燈  
起我棲逢意寒鳩欲化鷹

同王公佩和老杜韻

新長篔簹竹傍穿薜荔牆夜須邀月坐晝不待風涼刺  
放梢添綠斜將籜抱香幽居絕還往相伴興何長

又

弊屋甫環堵此君憂面牆當窓蔽寒綠入坐薦清涼客  
詠悶餘馨佛薰留散香老成看氣骨霜雪表靈長

和丁利用韻

末路初傾蓋春風一繫舟英姿森劍戟餘論有春秋時

事朝暮別年華日夜流徒勞是州縣東去勿遲留

和何子應遊西山

乘時休杖屨勝槩洗塵凡屏障開蒼壁龍蛇拔老杉水  
明花並倒山疊玉相攬卜築公相可吾當住翠巖

又和子應遊萬州岑公洞

泉細或疑雨巖深微見天暫來如可老長往不難仙石  
髓層層落松聲樹樹傳欲歸重回首明月傍船舷

題友人南北江山圖



金史卷之二  
卷二  
地廓秦山壯天涵海甸寬十年經眼處萬里入毫端戶  
牖開千嶂風煙老一竿已無圭組累圖畫不空看

送涪守何常卿十六韻

一時周屏翰千載漢循良寵渥分民社疲羸賴紀綱洪  
恩隨雨潤令問與風翔日月流年駛江山別恨長已聞  
談舊政方改視新章賤子千官底曾依數仞墻迂愚真  
濫吹浩蕩實包荒倦鳥棲林樾哀鴻顧稻梁一鄺聯戶  
版餘惠及耕桑迨此徵黃速還聞借寇忙江雲引行旆

峽樹遠歸檣亟欲承顏面於焉寫肺腸  
麥秋驅病馬山雨絕橫塘  
意去如飛鳥身留類觸羊  
登臨空悵望竚立更淒涼  
眷注期公久趨瞻預可量

西山一首

有客徵清賞攜筇上翠微  
雨差肥水面春恰染山衣  
破綠苔迎屐藏寒竹擁扉  
雲融開別浦天淨見孤飛  
語響留舟壑杯光艷落暉

和李工部月夜

天地渾無滓清光濯肺肝倚風哦絕唱想像見仙官  
照我行書冷戀君銀鬢寒家山想同夢倚玉夜闌干

題王與善隱軒

苦節風塵際甘心李孟間祿微幾飲水眼冷只看山  
江綠鷗十點簷踈月半環飽諳清淨趣渾未覺天艱

春日題相思寺

繫艇依寒渚扶筇上晚林山山春已立樹樹雨元深  
掃葉移床坐穿雲買酒斟相思思底事老大更無心

山居

溪帶三弓地山開一蓋天  
茅簷低沒霧藤路細迷懸  
惡草翻新耨獐彪突舊穿  
爭鷄喧臙膊靜鷺立孿拳  
翠著衣襟濕嵐薰草樹鮮  
老夫甘廢棄末路寄沈綿  
水出桃源俗人來谷口賢  
心期如水冷世事絕風傳  
瘡瘵高眠穩踈慵入靜  
便酒缸開半熟茶餅索新  
煎温飽無餘事安閒得剩  
年勝遊欣此始妄想置從  
前出處非吾浪乘除計亦  
全況因地靜粗了佛家緣  
零落餘生在寧無

火裏蓮

送楊元老召赴闕

羣心周道直萬國舜門開咫尺清虛地精微擇異材光  
輝生錦里合沓上蘭臺霄漢橫高翥風雲接大來龜龍  
紛秘奧奎壁煥昭回碧海浮城闕丹梯近斗魁由來陞  
密勿此地實胚胎早晚龍淵躍從容袞職陪斯文歸黼  
藻吾道久塵埃漢武威懷遠周宣正化恢治源先簡儉  
國本厚封培造膝心終啓前籌力竟回正宜須弼亮豈

獨藉淹該疇昔先登際聲名亦壯哉追風先蹙踏戢翼  
更徘徊巨寶應難價殊姿肯自媒中天懸日月萬里忽  
風雷戮力銘鍾鼎餘波及草萊故人元勃窣晚節更摧  
頽料想憐枯肺吹噓助酒杯

送張仁甫見何少卿續郎中二首

并州天下眷人物見遺英亂復歸何處貧甘送此君天  
高卿月滿雲靜使星明二老恩波闊扶衰強一行

又

水驛風煙暝江郊茅葦秋不關窮易老自是客多愁自  
倚連城價終艱一飽謀向非天下士強項敢輕投

月夜

秋立雨新霽氣清雲自消地空銀海闊天淨玉丸跳把  
硯承明露扶兒看碧霄病禁淒冷得不惜到明朝

遊我眉十一首

聞說最佳處深藏疊嶂間只須一兩屐更入數重山架  
竹深猶渡垂藤險可攀林泉未厭客風雨不教還

又

薄宦非初志幽棲有宿期勝遊宜數數老境已垂垂  
山好無時見雲閒逐處隨誅茅或未可細路有人知

又

蜀公愛山水無不到牛心歲久無從問詩亡不可尋  
雲堂環碧嶂溪路辟青岑從僻須回杖窮探不厭深

又

絕嶺人人到空迴亦大誇至人觀實相凡眼眩空花有



障猶隨牒無心已出家普賢吾日月歸屐候晴霞

又

緬想如天遠由來路不賒快穿靈運屐徑造普賢家仰  
睇雲霄遠回觀錦繡華老難持淨戒細細酌流霞

又

萬山皆拱揖蹲俯若臣隣初到最高處誰為第一人自  
驚渾俗骨或湧半天身初夏猶深雪難忘數飲醇

又

豈但山儲秀年多樹亦靈往來供靜矚參井入危經幽  
討真殊絕神光却渺冥正當存不議聊使俗迷醒

又

巖巒皆創見草木半無名翠削山山玉光搖樹樹瓊嶺  
雲隨客袂谷響苔僧行清絕渾無寐空山月正明

又

攬天元有路絕俗更無村孤眈臨崖背危升挽木根渺  
茫均遠邇倏忽變明昏佛現驚搜句巖前萬口喧

又

佛已歸無跡吾當反自崖  
肺腸蠲墜露衣佩結明霞  
陶令難忘酒龐公亦有家  
下山人借問姑射吃南華

又

雖知仙可學酒盞喚淵明  
未遂山中隱聊為地上行  
留人垂雨意送客走泉聲  
初上乘危慣歸途更不驚

雲安下巖二首

繫纜江沙靜杖藜巖谷春  
花依竹色好草入漲痕新  
占

笋苔初破嘗梅客  
遽擗篙師勿槌鼓  
幽興苦留人

又

曩遊成斷夢  
再至是陳人  
攬景追前跡  
尋詩拂舊塵  
孤松難破凍  
細草易生春  
晴日江天好  
凭欄愁更新

題梵音水野亭

黎州

三宿離桑下  
棲遲向一年  
無來元謾爾  
欲去也淒然  
峽路梅隨馬  
吳江柳繫船  
此生無再到  
題字寄山泉

題黃氏所居

金川集卷之二  
卷二  
環翠五六里深藏三四家風高鳴雁序春暖茁蘭芽門  
巷分楠直溪流帶竹斜我來風雪曉倚杖看梅花

遊雲泉寺

人日訪山寺春風能借溫柳橋通野水栢徑隱重門泉  
竇來何處梅花別有村從容尋後約假榻卧雲根

假守遂州視事二十日以臺章罷黜行至溫湯  
作此以寄同僚二十韻

聯事春將半去官春未歸儒冠真蹭蹬祖席有光輝罷

遣親刀筆勾牽坐釣磯同寮多俊彥投老失親依坐席  
邱無煖扁舟蟲亦肥泉聲清夢寐山色淨囊衣竹杖隨  
時拄山杯信手揮荷天將土苴為我易煙霏州縣徒勞  
耳簞瓢殆庶幾不糜公廩粟元長故山檄白髮心猶壯  
丹途計益非人生今殄瘁世路只歔歔苦潦人將溺思  
援手病疴道孤誰嘆息迹蹇共嘲譏去矣猶迴首憂之  
欲奮飛古今難骨鯁風俗易脂韋深峽真浮海溫泉當  
浴沂空山猿擇木豐草馬辭鞿已逐孤雲遠猶通一徑

微年年如問信深覓薜蘿扉

荅郭師聖

問訊煩書札情親語味長是非元自定得失已兼忘洗  
手分僧飯清心炷佛香窮城不假給何似水雲鄉

石漕生辰

夢斷熊羆夜祥呈饋鯉初固應賢有後誰謂慶無餘為  
國家相似憂民子不如符分四郡虎金佩十年魚未補  
三公袞聊分八使車權衡公選格陵阜富軍儲閎閎名

猶在朝廷席已虛稱觴勤祝頌二十考中書

張公升挽詩

掃地綠攢撥醅香遠墻是非閒處少日月醉中長  
滴悲歌露柯寒落葉霜百年成底事宿草任蒼茫

七言近體

中秋探韻坤字

山雨連秋懶出門嬋娟佳節更堪論一年有限天知己  
萬里無雲月返魂淡影參差收海岳清光浮動洗乾坤



擬憑罇酒相酬答，遮莫沈沈下別村。

秋日即事

人情節物自相關，強不悲秋亦恐艱。  
漸老身危生理索，憑高眼遠暮天寒。  
樹能長嘯風前聽，山亦多愁雨裏看。  
陶寫無他仗詩句，雁聲砧杵倚欄干。

秋夜書事

燈暗文書隔縠羅，寒欵竹枕倦吟哦。  
本來無事消魂得，作意撩人奈雨何。  
二十五聲秋點冷，百千萬緒客愁多。

海山寂寞應如此琴自無絃一放歌

和郭信可秋夜有懷

又是山寒水綠秋年華冉冉鬢邊流一聲孤雁人千里  
三點寒更月半樓宦海浮生成底事騷人徹骨是長愁  
天空地迴淒涼夜一曲商歌一掉頭

十七日夜月色尤佳與韋去非東亭小酌

秋來瑤海浴嬋娟天上人間又一年有酒何妨三夜看  
無雲尚見九分圓樓臺迴憶仙遊眼村落遙思禁曙煙

斗柄銜山風露冷歸來清絕不成眠

食筭

錦籜初開玉色鮮烹苞菹脯盡稱賢絕能加飯非無補  
浪說冰脾苦不便一日偶無慵下箸四時都有不論錢  
寒儒氣味都休問準擬凌風作瘦仙

送孫履道

平生心印久相傳出處窮通豈偶然且把新詩斟別酒  
莫將離恨惱衰年步兵未必非奇士太白惟知是謫僊

待我休官彭澤去約君同老白雲邊

上知已

十年宦海塵埃客文墨於人有底功天遠寧知心匪石  
官卑不許氣如虹唐雖未老行將老行不應窮究竟窮  
何日得君天上去收雲拾雨借長風

寄越州張子文待制二首

霜清玉潔紫微人海水羣飛蹭蹬頻首尾七年歸剪拂  
東西萬里隔聲塵酒杯強遣愁中趣藥裏長隨健裏身

天遠征鴻飛不到登高極目更傷神

又

風塵綿邈想懷家為報平安向海涯  
堦舊能詩鳴曉雁

兒初弄筆抹秋鷓陶張塞石真心腹  
四人為幹王蔡章

侯比輔車四人共家鄰也更有梁山何小隱  
要乘春漲別金華

何子應子文內兄  
金華子應山居

盧秀才家食梨

屢款盧仙貢玉堂  
谷梨霜飽每分香  
冰圓咀液涼  
疎齒

金醴吞甘澆熱腸誤誚斧斤訛魯簡駭聽名字笑吳娘  
好同火棗供嘉品端比蟠桃味更長

溪上望居人有感

溪上居人三兩家竹籬斜插倚蒹葭清流日暖魚飛浪  
靜渚輕煙鳥印沙鱸落霜刀分綵縷酒傾玉椀泛瓊花  
因思故國園林約默數歸期定不賒

感事詠菊

寒花冷艷為誰發霜露泠泠祗汝侵弱質向人如有託

清香絕世本無心  
會逢仙老收靈藥  
不用騷人費苦吟  
千載豈無陶靖節  
東籬蕭索待知音

詩呈監試

筆陣詞鋒已破堅  
深深簾幕度微煙  
紛袍幸免催詩雨  
堆案何堪造榜天  
走馬共知難看錦  
得魚自笑已忘筌  
芙蓉豈待春風力  
偶失知音勿斷絃

和食笋二首

敢將蔬笋擬甘鮮  
清瘦肥癡定孰賢  
氣味比僧從淡薄

支離似鶴要輕便未隨煙客登山屐且輟江神飲馬錢  
一歲可能三百把骨青髓綠配松仙

又

麋牙鴨脚色相鮮更遣逢迎酒聖賢魯大邦應自美  
煙霞清興豈相便風神肯慢吹成竹市老能教省直錢  
早晚蕭然文字飲何須喚作地行仙

早行

馬入寒林驚宿鴉羸僮呵手怯霜華已經殘月路數里



知過安眠人幾家  
噤噤曉烏天外唱  
踈踈煙樹嶺頭斜  
前程自謂明時近  
不用孜孜苦嘆嗟

新居鑿井飲之味殊清勝因成一首

丹砂黃菊莫年須  
清淨玄功世恐無  
千里長源開地脉  
數篙寒影落金樞  
蟄龍雨氣通滄海  
丹鳳秋風老碧梧  
事業正應歸鼎飪  
更分清韻入冰壺

曉行得江字

晴色招人步曉江  
牙牙瘦石水淙淙  
斷雲作片元隨伴

白鳥無羣不著雙  
淨渚鏡磨涵岨岨  
飛濤雲湧過舳舻  
煙蓑雨笠吾將老  
富貴心慙苦未降

客丹稜天慶觀夜坐

家山千里秋風客  
搔首夜深寒雨窻  
萬古興亡心一寸  
孤燈明滅影成雙  
鬢邊日月如飛鳥  
眼底塵埃擬漲江  
高枕欲眠眠不穩  
曉鍾迢遞發清撞

苦雨

噎鳩喚雨惱秋魂  
唾手殘天恨少文  
捲去行雲宜有主

放行飛海恐成羣濛濛遮眼尋山遠點點送愁緣竹聞  
神女工夫遽如許可能匝地洗妖氛

清明

寶勒香輪簇柳陰宦遊清味獨沈吟野雲未散山頭暗  
春水初生岸脚深萬里松濤寒食淚十年萍梗故園心  
狂風又捲殘紅去飛落誰家無處尋

思歸

安用區區五斗為竹籬茅屋喚人歸閉門高卧不通客

倚樹長吟懶繫衣  
秋稻水乾還築圃  
春蠶桑盡欲鳴機  
山雲野樹吾家物  
身瘦何妨道自肥

和王祖文

河東河北塞煙長  
誰作今年一葦航  
已見五龍思自奮  
似聞兩虎却相傷  
麟臺君有青雲路  
蝸舍吾其白首郎  
憂國憂家連夢寐  
端知不復有他腸

贈李西臺

瀟湘濃碧浸青天  
千里人家接楚田  
惜別正當歸雁後

相思無奈落花前  
江樓閣上雲藏樹  
野渡初迴月滿船  
看著行春驅五馬  
絲絲垂柳拂長鞭

索友人賡和

詩債遲遲不見還  
只緣草賦動天顏  
一揮可但難加點  
三復何消更索斑  
餘力自知過我輩  
新篇不合是君慳  
風流來往無多日  
肯與吾曹作兩班

和陳舜弼中秋有感三首

宦海浮沈久倦遊  
一聲雲雁一襟秋  
只今楚客多愁思

況是潘郎已白頭何處有山堪寄老此時無月亦登樓  
寸心或是孤雲起浩蕩天涯不可收

相別相逢總是天羯來醉月又經年君歸已買三山馬  
我去仍求一水船貧富勿論俱是夢雨暘休問苦無田

中秋已過重陽近頻向離筵醉拍肩

舜歛詩憂貧仍問  
兩故詩中及此因

以寬  
之

人間八九不如意獨坐蕭蕭愁絕時空有此心誰領會  
知余明月是襟期婆娑寒影不知老呼吸清光能療飢

今夕不妨休見面早苗須雨一深犁

送王公佩之瀘

炎薰五月只須臾底事書生亦渡瀘  
午影風涼槐繫馬  
曉峯雲白杖挑壺見聞幽谷鶯遷木  
氣類朝陽鳳集梧  
見說阿房曾有賦聲名速為詫東都

送馮貫道赴行在二首

路入丹霄起柂初峽山晴色曙煙疎  
海深南斗臨天闕  
江合西川直帝居禁漏深寒參佩玉  
御爐香暖散衣裾

遙知三接承恩罷日影參差轉玉除

又

儒雅風流總不如  
烝髦久合下旌車  
黃堂報政瓜初及  
宣室傾賢席已虛  
楚樹迎船春去盡  
吳蓮傍槳雨收餘  
留連物色題詩裏  
健步傳呼有峻除

雨中書事

昨夜風吹茅葦紛  
今朝急雨洗崖痕  
山山霞沒江喧枕  
樹樹鳩鳴雲到門  
隱几真心開暝照  
緇書老膝痺危蹲



山居染得疎慵病無復功名皓首論

謝杜合州送酒

浦樹江雲晚杜門史君書札問深村憂愁徹骨妨詩律  
賦詠開荒得酒樽病肺可能供痛飲濡唇亦足荷深恩  
呼兒擎出隨藤杖洗盞開嘗坐竹根

眉僧曉岑僕未之識也持鉢求施既辭以貧則  
願丐一詩詩未暇作而三至門知嗜好可喜  
也因書長句四韻以贈

門前剝啄遣兒鷹客是平生不識僧檀施吐嗟貧未可  
詞場馳逐老猶能識凌風月收孤思乞與雲山伴曲肱  
我亦從來慙綺語休將此段擬傳燈

和劉仲廉新年春望二首

年於鬢髮最相干又作新正一再看懶共燕泥烘午霽  
吟隨鶯樹澁朝寒餘生已分千人後燥吻猶須百榼乾  
愁絕向來飛鳥伴蕭然形影若為歡

又

關掠閒愁自不干因春成老亦看看花枝本自能時樣  
燕子從前有歲寒酒著醜顏衰似健杖扶沙步雨猶乾  
杜門何似頻還往藉綠簪紅趁逐歡

送張卿赴西路憲

不容巴國戀深仁使節朝馳詔墨新山水兩川奇勝地  
典刑三晉老成人使星正自臨東井御月元來照紫宸  
自是臯陶多邁種歸毘舜德詠臣隣

九日邀郭信可登龍鶴山

已脫青衫付酒家請君含笑岸烏紗百年行見星星髮  
一醉須還歲歲花令甲許人休吏卒峯巒邀客上煙霞  
龍山故事依然在莫把風流讓孟嘉

冬至有感

蕭辰俛仰及嚴冬白髮空云是至公造雪不成天本恕  
喚梅未醒句無功可能人事無消長只待天時有變通  
節物相關愁似醉一庭霜葉一窓風

南至即事

愛惜清秋預恐貧，豈堪時序過來頻。  
待梅沽酒無多日，隔臘看春只並隣。  
俗薄連墻成異縣，時難佳節是蕭辰。  
望雲還卜中興日，澣淚乾坤一小臣。

梅花

正是園林花木衰，冰姿玉潔出疎籬。  
月中瘦影道傍見，江上寒香人不知。  
時節驚心非故物，簿書滿眼欠新詩。  
碧雲暮合關山遠，擬折瓊英寄所思。

落梅

不禁清瘦怯風霜  
遠信先憑驛使將  
樓上笛聲吹舊曲  
鑑中人面學新粧  
飄零院宇仍多思  
點綴簾櫳亦自香  
留與春風共流轉  
憑誰試與祝東皇

茶麩  
西

萬仙同駕碧雲翔  
容與人間散異香  
梅似前賢長隔世  
酒真同氣莫相忘  
流鶯夢斷驚風雨  
落月魂銷映雪霜  
春暖日長無一事  
飛花片片倚胡床

和向文叔見寄

煙雲浩蕩五湖身老向風塵學問津白髮只應無奈若  
青衫定是可憐人草侵吟枕依依夢花傍愁襟故故春  
江上負暄樵牧晚素書千里慰蕭辰

緡雲寺

借問禪林景若何半天樓殿冠嵯峨莫言暑氣此中少  
自是清風高處多岷岷九峯晴有霧瀾瀾一水遠無波  
我來遊覽便歸去不必吟成證道歌

謝陳舜敬送丹荔

驪珠三百照傾箱一一都全味色香道遠鶴觴齊騎驛  
雨多龍伯護津梁蠲煩已笑冰無味過眼仍同玉有光  
報貺無他空覓句更慙詩骨謝凌霜

寓樓隱僧舍讀書

茅竹無錢結翠霞歸來棲止梵王家夜窻聽雨翻書葉  
曉研凌霜注井花已隔朱樓安管鑰獨尋碧磧問津涯  
蘆簾紙帳門如水兀坐蒲團事不賒

過鐵山驛



來時赴作世情遊歸去淒涼遣客愁萬事世間多反復  
一生此地幾春秋寒樹老葉全脫水落岸高溪不流  
行路崎嶇縱難料江湖付與一孤舟

清富軒

道高清識自超殊白璧黃金視若無坐側擁書皆是寶  
望中森木盡為奴朱簾畫棟皆成俗綠水青山可與娛  
日有輕肥尋訪去每教留戀過殘鋪

題蔡雲叟山居

茅屋依雲晚未收一門山色倚寒流  
戲簷黃雀驚彈劍  
飲水烏猿看放鉤  
醉卧落霞斜枕手高吟晚日更昂頭  
朝廷莫問安邊策人在深山笑五侯

送常德翁知縣

山多豺虎水蛟龜  
萬里歸來只舊官  
莫問蒼生待君起  
須知白髮見親難  
高蹤已逐飛鴻去  
凡眼休將退鷁看  
得句驚人須寄我  
時時要看老波瀾

寒食夜坐

雨餘虛廡靜前墀坐到空江月上時馬嚼青芻喧夜寂  
人圍綠幕夢歸期一年已是逢寒食千里誰能慰客思  
留宿春城愁落寞杏花明日更離披

將之瀘南

幾年落魄劍南州重入蠻鄉覓舊遊十驛出城難夙駕  
一生浪跡愧虛舟家留異縣懷親老夢遶滄洲恐鬢秋  
白馬鳴寒如可問此身端復謝沈浮

村居

飛蛾故故撲燈光  
風雨蕭蕭打紙窗  
人為官方搔白首  
虎來村落渡清江  
猿啼冷日誰家夢  
故國愁牽幾曲腸  
籬菊何曾憂戰伐  
夜添寒藥趁重陽

送同年朱元直監稅

會計牛羊道益光  
幽蘭不佩亦芳香  
前郎未必辭官小  
我輩惟知作法涼  
客抱只消潘鬢白  
俸囊無奈朔身長  
要知別後相思地  
獨上西山下夕陽

又

秋風可擬借年光  
曉覺新筠潑鼻香  
黃菊丹萸元嫵媚  
敗荷衰柳自淒涼  
山纔入眼身尤健  
事不關心日便長  
欲把酒藤凌翠嶠  
醉餘起舞送重陽

又

池上千巖入曉光  
無花草木自吹香  
眼隨天霽山山見  
心與秋清事事涼  
長嘯響驚龍壑靜  
微吟思入雁雲長  
未須搖落增悲慨  
新報王師復洛陽

謝韓秀才送松栽四首

新拓藤蘿住翠巒移根干本到雲端初乘雨露迎春種  
便作雲霄蔽日看巖穴從今增氣象茯苓可擬救衰殘  
知君有意憐棲隱更約堅身待歲寒

又

鬱葱待得覆巖巒巒愛護關心豈一端已恐旱乾支水逃  
更防牛馬倩人看何當倚杖聽蕭瑟便欲從渠號懶殘  
物色最宜清淨觀列仙癯瘦不言寒

又

已將疎懶寄雲巒人世于今有萬端整頓林泉宜急急  
上還簪綬亦看看移根遠帶前山澗荷鍤行衝小雨殘  
急爾成林十年後颼颼為作暑天寒

又

殮松食栢老巖巒藥餌從今可問端髮白顏蒼無復懼  
骨青髓綠後來看色隨春焙茶煙碧涼入晨烹竈火殘  
自是本來山澤相故煩天遣伴淒寒

代簡寄壁山諸友慈洞硯

聞道諸郎長似林  
臨池已遣學山陰  
信傳鴻翼兼雙硯  
物比鵝毛表寸心  
書札總無緣  
嬾病襟懷堪寄有  
孤吟  
歸裝準擬隨春色  
歲酒須留待細斟

春久不雨

老將百指寄耕田  
雨不霑春重慨然  
雲染夕曛成返照  
霧隨山色化輕煙  
王官掃廩徵豐歲  
野史濡毫記有年  
咄爾虬龍須早起  
莫將乖懶滯重淵

春和譚曦晉仲見惠之什  
晉仲變人隱居歸之



城下簞食瓢飲有可樂者

大隱休誇渾俗塵由來空谷有幽人只無憂患催垂白  
何必功名掛汗青我已退非金馬客君宜上應少微星  
卜隣有意誅茅切竹杖交頭到夢屏

和史濟川見贈

歲晚扁舟雪霰邊蕭疎與君俱可憐向來共厄黃楊閏  
別後相逢白髮年覓句剩煩梅作興攻愁直縱酒稱賢  
故人一笑誠希闊得失休論布幔天

乾  
坤  
艮  
巽  
坎  
離

縉雲文集卷二